

ՆԱՅԱՍՏԱՆԻ ՆԱԼՐԱՊԵՏՈՒԹՅԱՆ ՍԱՆՄԱՆԱԴՐԱԿԱՆ ԴԱՏԱՐԱՆԻ

ԱՇԽԱՏԱԿԱՐԳԱՅԻՆ ՈՐՈՇՈՒՄԸ

«ՀՀ ԱՐԱԳԱԾՈՏՆԻ ՄԱՐԶԻ ԸՆԴՀԱՆՈՒՐ ԻՐԱՎԱՍՈՒԹՅԱՆ ԱՌԱՋԻՆ ԱՏՅԱՆԻ ԴԱՏԱՐԱՆԻ ԴԻՄՈՒՄԻ ՀԻՄԱՆ ՎՐԱ՝ ՀՀ ՔՐԵԱԿԱՆ ՕՐԵՆՍԳՐՔԻ 141-ՐԴ ՀՈԴՎԱԾԻ 2-ՐԴ ՄԱՍԻ 3-ՐԴ ԿԵՏԻ՝ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐՑԱԼ» ԳՈՐԾԻ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

ՀՀ սահմանադրական դատարանը, քննության առնելով «ՀՀ Արագածոտնի մարզի ընդհանուր իրավասության առաջին աստիճանի դատարանի դիմումի հիման վրա՝ ՀՀ քրեական օրենսգրքի 141-րդ հոդվածի 2-րդ մասի 3-րդ կետի՝ Հայաստանի Հանրապետության Սահմանադրությանը համապատասխանության հարցը որոշելու վերաբերյալ» գործի վարույթը «Սահմանադրական դատարանի մասին» ՀՀ օրենքի 60-րդ հոդվածի 1-ին կետի հիմքով կարճելու մասին գործով զեկուցողի առաջարկությունը, **Պ Ա Ր Ձ Ե Ց.**

1. ՀՀ Արագածոտնի մարզի ընդհանուր իրավասության առաջին աստիճանի դատարանը 21.01.2016թ. ՀՀ սահմանադրական դատարան մուտքագրված դիմումում ներկայացրել է մի շարք փաստարկներ ՀՀ քրեական օրենսգրքի 141-րդ հոդվածի 2-րդ մասի 3-րդ կետի՝ ՀՀ Սահմանադրությանը (2015 թվականի խմբագրությամբ) հակասելը հիմնավորելու համար:

2. Դիմումի եւ կից փաստաթղթերի ուսումնասիրությունը, ինչպես նաեւ ներկայացված փաստարկների վերլուծությունը վկայում են, որ դիմումը չի բավարարում հիմնավորված լինելու վերաբերյալ «Սահմանադրական դատարանի մասին» ՀՀ օրենքի պահանջին եւ չի համապատասխանում այդ հարցի կապակցությամբ սահմանադրական դատարանի բազմիցս արտահայտած իրավական դիրքորոշմանը (17.03.2009թ.

ՄԴԱՌ-21): Մասնավորապես, նշված օրենքի 71-րդ հոդվածի 5-րդ մասի համաձայն՝ դատարանը պետք է հիմնավորի իր դիրքորոշումը նորմատիվ ակտի վիճարկվող դրույթի՝ Սահմանադրությանը հակասելու հանգամանքի առնչությամբ: Մինչդեռ դիմողն ըստ էության բարձրացնում է ոչ թե սահմանադրականության հարց եւ դրան համապատասխան ներկայացնում իր կողմից վիճարկվող դրույթի հակասահմանադրականությունը հիմնավորող փաստարկներ, այլ այդ նորմի եւ վերջինիս առանձին եզրույթների իրավաբանական եւ քրեաիրավական բովանդակության բացահայտման, իրավակիրառական պրակտիկայում դրանց միակերպ ընկալման ու կիրառման հարցեր՝ ներկայացնելով դրանք որպես խոչընդոտ՝ իր վարույթում գտնվող քրեական գործով ըստ էության որոշում կայացնելու հարցում: Միաժամանակ, դիմողը բարձրացնում է «իրադրության փոփոխման» պայմաններում «քրեական պատասխանատվությունից ազատելու», ինչպես նաեւ «պատիժը պայմանականորեն չկիրառելու» քրեաիրավական ինստիտուտների արդյունավետ եւ իրավաչափ կիրառման հարց՝ չվիճարկելով ՀՀ քրեական եւ ՀՀ քրեական դատավարության օրենսգրքերի համապատասխան նորմերի սահմանադրականությունը:

3. Սահմանադրական դատարանն իր՝ 17.03.2009թ. ՄԴԱՌ-21 որոշմամբ (եւ հետագա մի շարք այլ որոշումներով (13.11.2012թ. ՄԴԱՌ-80, 08.04.2014թ. ՄԴԱՌ-13, 07.04.2015թ. ՄԴԱՌ-19, ինչպես նաեւ 05.02.2016թ. ՄԴԴԿՈ/1-4, 18.02.2016թ. ՄԴԴԿՈ/1-5, 21.03.2016թ. ՄԴԴԿՈ/1-9, 02.04.2016թ. ՄԴԴԿՈ/1-13 եւ այլն) վերահաստատված) իրավական դիրքորոշում է արտահայտել, համաձայն որի՝ «... բոլոր այն դեպքերում, երբ դիմողը, ձեւականորեն վիճարկելով օրենքի դրույթի սահմանադրականության հարց, ըստ էության բարձրացնում է այդ դրույթի **կիրառման իրավաչափության հարց**, ... ապա այդպիսի դիմումները ենթակա են մերժման՝ «Սահմանադրական դատարանի մասին» ՀՀ օրենքի 32 հոդվածի 1-ին կետի հիմքով՝ որպես սահմանադրական դատարանի քննության ենթակա հարց չառաջադրող դիմումներ»:

4. Սահմանադրական դատարանն անհրաժեշտ է համարում նաեւ արձանագրել, որ օրենքի, վերջինիս որեւէ դրույթի իրավական բովանդակության բացահայտման եւ միատեսակ կիրառության ապահովման իրավագործությունը սահմանադրորեն վերապահված է եռաստիճան դատական համակարգին եւ դիմողի կողմից բարձրացված հարցերը

լուծելի են օրենքի միատեսակ կիրառման համապատասխան նախադեպի ձեւավորման շրջանակներում:

Հաշվի առնելով վերոշարադրյալը եւ ղեկավարվելով Հայաստանի Հանրապետության Սահմանադրության 101-րդ հոդվածի 7-րդ կետի, «Սահմանադրական դատարանի մասին» ՀՀ օրենքի 32-րդ հոդվածի 1-ին կետի, 60-րդ հոդվածի 1-ին կետի, ինչպես նաեւ 71-րդ հոդվածի 5-րդ մասի պահանջներով, Հայաստանի Հանրապետության սահմանադրական դատարանը **Ո Ր Ո Շ Ե Ց**.

«ՀՀ Արագածոտնի մարզի ընդհանուր իրավասության առաջին ատյանի դատարանի դիմումի հիման վրա՝ ՀՀ քրեական օրենսգրքի 141-րդ հոդվածի 2-րդ մասի 3-րդ կետի՝ Հայաստանի Հանրապետության Սահմանադրությանը համապատասխանության հարցը որոշելու վերաբերյալ» գործի վարույթը կարճել:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՍԱՀՄԱՆԱԴՐԱԿԱՆ ԴԱՏԱՐԱՆԻ
ՆԱԽԱԳԱՀ**

Գ. ՀԱՐՈՒԹՅՈՒՆՅԱՆ

31 մայիսի 2016 թվականի
ՍԴԱՈ-37